



Assemblée générale ordinaire du 26 mars 2015

Allocution du président Fernand Muller

Dir Dammen an Dir Hären,
Léif Kolleginnen a Kollegen,

Merci, dass dir haut den Owend an d'Generalversammlung vun der AGC komm sidd.

Wéi déi Jore virdrun sinn ech besonnesch frou haut och nees dne Här Maurice Schmitz, ee vun eisen treie Grënnungsmitgliedern, hei begréissen ze kënnen. E weidere Grënnungsmitglied a fréiere Generalsekretär vun der AGC de Pierre Trausch léisst sech ëntschele, well en haut den Owend fir d'CGFP am Asaz ass. Hien huet gemengt dat hei wier déi éischt Generalversammlung vun der AGC déi hie verpasst. Dat si Memberen ...

De Juli dëst Joer ginn et scho 40 Joer, dass si d'AGC gegrënnt hunn. Deen neie Comité vun der AGC kann also schon am éischte Joer mat enger Feierlechkeet ufänken.

Begréisse wëll ech awer och eise fréiere President de Michel Schmitz, awer och all aner Ancienën a fréier Memberen aus dem Bureau exécutif an aus dem Comité vun der AGC.

Wéi all Joer si mir och frou eise Kolleg Romain Wolff, Generalsekretär vun der CGFP hei kënnen ze begréissen.

Desweidere begréissen ech den Här Georges Muller, Direkter vun der Chambre des fonctionnaires.

D'lescht Joer hate mir eis Generalversammlung den 3. Abrëll zu Mënsbech.

Eng Generalversammlung huet et esou un sech, dass een op d'Evenementer vun deene leschten 12 Méint ageet. No deem méi stiermesche Joer 2013 war d'Joer 2014 politesch gesinn dat éischt vun der Dräierkoalitioun. D'Land krut e

weidere Spuerpak verpasst, et gouf en Zukunftspak gestëmmt.

An de leschten Dënschdeg gouf dann endlech no jorelaangem hin an hier de Reformpak an der Fonction publique gestëmmt, e Reformpak zu deem jo och den Accord salarial gehéiert.

Et war de 26. Juli 2012 wou all déi Gesetz- a Reglementsprojetë vum Reformpak publizéiert goufen an an d'Chamber komm sinn. Duerno ass et esou richteg lass gaange mat den Diskussiounen. Kaum eng Associatioun huet sech net zu Wuert gemellt an verschiddener hunn souguer e Litige géint d'Regierung lancéiert. D'AGC huet der souguer 2 lancéiert, eemol géint déi al Regierung an no der virgezunnene Neiwalen nach eemol géint déi nei Regierung. Ouni Erfolleg, wéi mir haut wëssen.

Och aner Associatiounen haten an hunn nach ëmmer Bedenken zum Reformpak. Onverständlech ass dobäi wann eng Associatioun um Niveau CGFP zu 100% fir déi Reform gestëmmt huet an den Dag duerno déi guttgeheeschte Moosnamen nees a Fro stellt, haaptsächlech well Konkurrenzassociatiounen sech och kritesch geäussert hunn. Als AGC fanne mir d'Bewäertung vum Beamten och net gutt, mä mir waren eis Konsequent an hunn net zu 100 % derfir gestëmmt.

Als AGC ware mir do méi skeptesch, well de Reformpak eis net zefriddestellt, wat eis Carrière betrëfft. Mä et war elo Zäit gi fir de Vote an der Chamber, well soulaang d'Reform net gestëmmt war, gouf se nach ëmmer kritiséiert. Wann iergendwou en neie Comité an den Asaz koom ass et nees lass gaange mat der Kritik. Dat bleift deem neie Comité vun der AGC erspuert, deen haut dëser Generalversammlung ervirgeet, well de Vote ass perfekt a mir mussen alleguer dermat liewen an dat bescht draus maachen. Och de finanzielle Volet ass net näischt an dësen Zäiten.

Dofir war d'Regierung dat lescht Joer och net zevill presséiert fir d'Reform duerch d'Chamber ze bréngen. Si huet sech bestëmmt gesot, esoulaang d'Reform net gestëmmt ass kascht se näischt, well dass se eppes kascht, ass evident. Mä et muss jo awer gespuert ginn. Domat sinn ech beim Stéchwuert spueren a bei de Finanze vum Staat.

Ah jo do waren nach d'Luxleaks déi eist Land an e schlecht Liicht geréckelt hunn, well mir nationalen a multinationale Gesellschaften hir Steuerlaascht méi liicht gemaach hunn. Well awer anscheinend 26 vun 28 EU-Länner dat och maache kann ee sécher sinn, dass op deem Punkt näischt geschitt. Dat wier jo och Contraire zum System. E System wou d'Betriiber ëmmer manner Steiere bezuelen, a wou d'Personnes physiques ëmmer méi Steuerlaascht ze droen hunn. Dobäi ass besonnesch schlëmm wann och nach bei de Stéit mat Kanner gespuert gëtt.

Et ass ze hoffen dass et eise d'Staatsfinanze weider gutt geet. A wann net - da kréien déi kleng Leit an d'Statsbeamten am Budget 2016 e weidere Spuerpak verpasst. D'Betriiber bleiwe vu Steiererhéijunge verschount, dat hunn déi schonn emol als Konditioun gesat, wéinst der Kompetitivitéit.

CHFEP – Walen

Walen ass gutt gesot, well bei eiser Carrière ass guer net gewielt ginn. D'Konkurrenz huet keng Lëscht méi présentéiert. Mir hunn also emol sécher 5 Leit fir déi nächst 5 Joer an der Chambre des fonctionnaires et employés publics.

Et ass awer haut scho viraus ze gesinn dass dat 2020 net méi de Fall wäert sinn, well no der Reform gëtt d'Gewiichtung vun de Carrièren eng ganz aner gëtt, net zulescht wéinst der neier Carrière vum Bachelor ...

Elo bleift just nach ze hoffen, dass d'Representativitéit vun eisem Daachverband der CGFP confirméiert gëtt. Well et gi Konkurrenzlëschten ...

AGC - Wale vum Comité

Fir mech perséinlech ass dat hei scho bal eng historiesch Generalversammlung, well ech mengen et sinn 30 Joer wou ech mech fir d'éischt als Suppléant am Comité vun der AGC engagéiert hunn. Vun 1985 un war ech am Comité sief et als Suppléant oder als effektive Member.

Dat wor déi Zäit wou eis Kollege Jos Schaack als President a Raymond Hencks als Generalsekretär d'Geschécker vun der AGC geleet hunn. De Jos Schaack war AGC-President bis 1999, wou hien an d'Regierung komm ass als Statsekretär fir d'Fonction publique. De Raymond Hencks ass deemols Generalsekretär an der AGC bliwwen ënner dem neie President, eise Kolleg Michel Schmitz.

2003 wollten dunn de Michel Schmitz, de Raymond Hencks an och de laangjäregen Trésorier Jean Nau hir Mandater net méi erneieren an d'Zeeche stoungen op Erneierung am Comité an am Bureau exécutif vun der AGC. misse weidergoen ...

An der Generalversammlung vun 2003 gouf en neien AGC-Comité vun 19 Leit gewielt an et haten sech och nach eng Parti Suppléantë gemellt.

An der éischer Reunioun no der Generalversammlung gouf en neie Bureau exécutif gewielt. Mir waren deemols alleguer richteg motivéiert fir d'Interesse vun der Carrière vum Redakter gutt ze verrieden, mä mir woussten och schonn

deemols , dass dat eng ganz schwéier Tâche géif ginn. Dat war am Mäerz 2003, also virun 12 Joer. Esou séier geet d'Zäit erëm...

2003 gouf d'Uni Lëtzebuerg gegrënnt a mir hu séier gemierkt, dass deen Anschluss scho verpasst war. Mir hunn dorophin déi al Fuerderung vum Bac+2 fir Redakteren ganz séier un déi aktuell Situatioun ugepasst. Well Lëtzebuerg 1999 schon d'Déclaratioun de Bologne ënnerschriwwen hat war et kloer dass den éischten Diplom op der Uni de Bachelor wier. Déi Basisformatioun hu mir also an eisem Mémoire iwweholl a mir si mat där Fuerderung bei déi jeweilig Ministere gepilgert.

Den Erfolleg blouf leider aus. En Erfolleg wier gewiescht wa mir erreecht hätten, dass d'Schoulformatioun fir an d'Carrière vum Redakter eranzekommen op den Niveau Bachelor gehuewe gi wier, esou wéi dat bei deenen anere Carrières moyennes gemaach gouf.

Mä et sollt net sinn. Déi all Regierung ass net drugaangen, an déi nei huet de Reformpak net méi opgemaach. Als AGC ass et eis net gelongen eis Carrière op den Niveau Bachelor ze hiewen. D'Redaktere kruten eng nei Bachelor-Carrière virun d'Nues gesat a sinn elo an der drëtter Rei vun der Hierarchie beim Staat.

Egal wéi, den Zuch vun eiser Formatioun ass elo fort, an eis Schoulformatioun bleift um Niveau 1^{re} oder 13^e. Mä zum Gléck hu mir finanziell net zevill Plomme gelooss. Eis Leit kënnen um Niveau supérieur automatesch avancéiren an déi déi op engem Poste à responsabilité sëtzen, kënnen och nach 10 Joer laang an d'Bachelor Carrière eropklammen.

Fir mech geet mat dëser Generalversammlung, trotz allem wat net gelongen ass, eng schéin Zäit bei der AGC op en Enn, eng ganz kollegial Zäit mat Vertrauen a Respekt, wou kaum en haart Wuert gefall ass a wou mir eis munechmol gutt ameséiert hunn.

Wat mech awer besonnesch freet ass de Fait dass et an der AGC weidergeet. Et ass esouguer groussen Intressi – méi gesi mir ënner dem Punkt 7 vum Ordre du jour vun haut.

Voilà - Domat sinn ech um Enn vu menger Allocutioun ukomm.

Ech soen lech merci.